



12. august 2010

UKA 2010/66

Inatsisartut Suleriaasianni § 32 naapertorlugu aalajangiiffigisassatut siunnersuut imaattoq matumuuna saqqummiuppara:

Meeqqanik pinerliisimanginnermut uppersaatinik piumasaqaateqartussaataaneq pillugu Inatsisartut inatsisaat nr. 8, 19. maj 2010-meersoq ilallugu inuusuttut 15-t 18-nillu akornanni ukiullit isersimaffiini timersoqatigiiffiit klubbiini fritidsklubinilu sulisunut inuusuttunik pinerliisimanginnermut (pinerlussimanginnermut) uppersaammik piumasaqaateqartussaataalernissaq pillugu Inatsisartut aalajangiiffigisassaattut siunnersuut.

(Inatsisartunut ilaasortaq Andreas Uldum, Demokraterne)

Tungavilersuut

Demokraatini isumaqarpugut pissusissamisoortoq meeqqanik pinerliisimanginnermut uppersaammik piumasaqaateqartussaataaneq, tamannalu piviusunnngortinneqarpoq, meeqqanik pinerliisimanginnermut uppersaammik piumasaqaateqartussaataaneq pillugu [Inatsisartut inatsisaat nr. 8 af 19. maj 2010](#) –meersoq akuersissutigineqarmat.

Inatsit nutaaq naapertorlugu, meeqqanik 15-t ataallugit ukiulinnik suliaqartoq pillugu meeqqanik pinerliisimanginnermut uppersaammik piniartoqartalissaq. Tamatuma kinguneranik paasisutissanik piniarfigineqartalissaq Det Centrale Kriminalregister, ulluni naliginnarni sulinermi meeqqanik sullissineq aallunneqarpat.

Demokraatilli ernumanartutut isigaat inatsimmi inuusuttut 15-niik 18-nut ukiullit eqqarsaatigineqanngimmata. 15-leereersimagaanni pineqaatissiissutaanngitsumik kinguaassiutitigut atoqatigiit-toqarsinnaavoq, tassa imaappoq inuusuttup kialluunnii aalajangersinnaavaa kina atoqatigerusunerlugu. Taamaakkaluartorli aatsaat inersimasutut piginnaaneqartitaasoqalersarpoq 18-leereersimagaanni.

Tamatta nalunngilarput, inuusuttorpassuit tammaariartillutik, timersornikkut unammiaartornernut atatillugu assigsumilluunniit pissuteqarlutik angajoqqaatik ilaginagit ungasissumut angalasariaqartartut. Taamaattoqartillugu angajoqqaat inersimasut angalaqataasut paarsisussat tatigisariaqartarpaat assersuutigalugu meeqqatik kinguaassiutitigut atonerlussanngikkaat. Angajoqqaalli amerlasuutitigut tatiginniinnartariaqartarput. Inersimasoq angalaqataasoq meeqqanik atonerlueriartartuuppat, inersimasunut ajornanngitsuaraasussaavoq inuusuttuaqqanik sunniisinnaaneq, tungaviusumik inuusuttuaqqat inersimasunik tatiginnittuummata. Soqutaanngila sungiusaasoq perorsaasorluunniit meeqqanik akisussaaffigisaminik atonerluissappat, 15-leersimanerat pissutiginnarlugu ?

Meeqqanik pinerliisimanginnermut uppersaammik piumasaqaateqartussaataaneq pillugu inatsit akuerineqarmat Inatsisartut ataatsimiimmata 2010-mi upernaakkut (imm. 28) apeqquteqartoqarnera naapertorlugu, Kulturimut, Ilinniartitaanermut, Ilisimatusarnermut Ilageeqarner-

mullu Naalakkersuisoq akivoq, meeqqanik pinerliisimanginnermut uppersaammik piumasaqaateqartoqarsinnaangitsoq meeqqat 15 sinnerlugit ukiullit pineqarpata. Paarlattuanik sulisartut meeqqanik inuusuttunillu 15-t sinnerlugit ukiulinnik sullissisut pinerlussimanginnermut uppersaammik piniarsinnaatitaapput, tamanna inatsisaasariaqartoq Demokraatini isumaqarpugut.

Demokraatit kissaatigaat, timersoqatigiiffiit klubbiini fritidsklubini kiisalu sullivinni allani inuusuttut isersimaffiini sulisunut pinerliisimanginnermut uppersaammik piumasaqaateqartussaa-titaasalertariaqartut.

Taamatut oqaaseqarlunga Naalakkersuisut akissutissaannut partiillu allat oqaaseqaatissaannut qilanaarpunga.